



Selasa, 06 Oktober 2020

Ogen: Jeremia 34:1-7



Mate I Bas Dame



Kerina si nggeluh i doni enda lit pagi paksana mateme. Tapi kuga carana ia mate ras kuga ka cara kalak sideban ngidah ras memaknai kematenna. Jadi kalak si nggeluh ras si mate, tetap mereken erti man manusia si nggeluh dikune megermet kita kerna perdalinen geluh seh matena. Kegeluhen manusia menaken kin tubuh seh mate jadi sada sejarah si perlu ipergermetken kalak sideban gelah jadi pengalamen si mpengasup manusia ngangkai erti ras makna kegeluhen. Sejarah geluh manusia la lit seragam, kerina unik, janah kegeluhen enda arus iperjuangkan seh maka jadi sada turi-turin geluh si mpengasup kita ngidah cara Dibata erdahin. Jadi sada kesempatan si erbahan tep-tep babah ngasup ngatakan bujur man Dibata si mereken kegeluhen.

I bas paksa ngalaken kematen, la kerina manusia sikap ibas paksana. Umumna labo si eteh ndigan kita mate. Amin megati ikatakan i bas kerina paksa kita ersikap ngalaken kematen si la si eteh, ndigan ras katawari paksana kematen e reh ndahi kita. I bas renungenta wari enda, si idah kerna tenah Kata Dibata man raja Sedekia, kuga kegeluhenna i bas paksa si reh. Ikatakan reh me paksana bangsa enda iendesken man raja Babil, bangsa enda italuken Babil janah ibaba me ia kerina ku pembuangan. Tapi sada berita si ipeseh man raja maka labo ia mate i bas peperangan, tapi mate i bas dame janah 'porsesi' penguburen man raja ialokenna me i bas paksana: itutung kumenen ras itangisi rayatna me ia pagi. Bagenda me isehken man Sedekia i bas paksa kerehen imbang si nerang ia.

Pengergan kalak si mate ilakoken i bas acara penguburena, i je me kerina kehamaten subuk alu iluh, luah: bunga, uis dagangen ras kata persirang-sirangen isehken man bana. Emaka i bas kegeluhenta paksa enda, labo sitik orangtuanta si enggo metua nikapken kematenna jine, alu nehken pedah ras pemindon man anak kempuna. Adi seh paksana mate ipindona i ja ia ikuburken deba enggo ibahanna kuburena, kai ras kuga acara peradatenna, utang adat pe enggo deba sikapkenna. Banci ikatakan, enggo tuhu ia ersikap bage me keadan dame si iarapkenna. Nadingken kegeluhen doni dingin bengket ku ingan kesenangan si rasa lalap.

 Nadingken kegeluhen alu tenang tanda kematen si dame